

Yaraya

Minikwak pahavwi amekene, ig wasevutne. Kuri ig tivik avit paha waxri, kadahan yaraya ka ayhsima avit waxri, axe gihat madikte. Gihat miyap. Kuri ig danuh tagit ginag, ig awna :

- Mam, nuhat axwika madikte, yaraya axwin.
- Ku henne, uya higihwa ayteke.

Nikwe ig tivik ayteke. Danuh wasawka, ig manuk amun paha waxri akiw. Ig tiyehe giwasra. Yaraya keh novinawa akak akiw. Ig mutuhe gihat nikwe ini, kiniki barew gakivay, yaraya kavusaw ax gihat. Ig diyuhe givinekut, gig awna ta git :

- Awayg, mmah pihat axwika ?
- Ihi, yaraya axwin.
- Amawka pis ivegha nopsad suwyeg, pis.

kivunsin akak un, pis batahkisni arutik tiket, padak un kudihpiye avit yarayavin. Ku aysaw ig danuh atere, muwok waykehpad kuwis, ig ka ik adahan huwiya tiket. Ig hiyamni henne, ig ka padak un, ig iwe ah, ig pitihe yarayavin. Hewke ig danuh atere, ig beke gitimka nikwe, pisenwa

batahkis gisuwyega atere in, ku un kudihpad kuwis, ig dumukwin avit yarayavin. Kuri yaraya gikivarakis hiyamni henne, ig kamaxwig, ig awna ta git :

- Pariye pikehni ini ka wadit?

Pis dunihe uvin. Amawka pis kannikasa awenyan. Nah iki pit paxnika madikwa hawkri adah pis kabayhin. Pis kannivwinek abet muwokad, abet kamuw awahni. Kadahan ka ayhsima tinogben ayge, mahamwayamni gubitakis. Igme yaraya gikivarakis, ig ka nopsimahad hiyeg. Kuri, amekene misekwe ayge. Ginagme wahevgi nikwe, eg awna :

- Kite nukamkayh, mmahki ig ka danuh ?

Eg awna ta git gigihgi :

- Pihawkanavrik, pis awahkis nuhamkayh tah pitih yarayavin, ya kitwikig nikwe ?
- Gigihgi awna.
- Nah ta iwasavgite.

Kuri ig danuh atere, ig yumehe. Kuri muwok wayk, muwok wayk, muwok wayk... Yaraya kannivwi abet muwok. Gig diyuhe nikwe pahavwi. Amekene misekwe ayge pahavwi kayg, ig kehe madikte annivwit gidukwenavrikis yaraya. Kuri danuh hawkri adahan ig ivegvene ahamna. Ig wagehe ta inut averuwit ah kanopsimahad, ayge ig hiyapka givitkis neras hiyeg ku pariye gihiyekten. Igkis kanum giw :

- Tanay, pariye pikehni ay ?
- Nah ay, katiwnihpiye nutaraksan.

Atak akka gut nnaguh ku nah ka miya. Nah ay adahan paxnika madikwa hawkri. Ku aysaw nah pisenwa nannivwi, nah danuh aterenek. Kuri ig misekwe ayge. Ig kannivwi, ig kannivwi, ig keravip. Ig kannivwi abet muwok, ig kannivwi abet kamuw awahni. Ig hiyuh ahamna hewke tiyegim, mataytak. Gimana ikaka aynesawa. Pahay hawkri, gikivara awna ta git :

- Tanay, ku avim inin nah isaksap adahan pis tivikiwasene pinag.

Henneme kaba kaveyni hahwata akiw. Ku pis hiyamnek yarayavin, ka muwaka mehni akiw. Pis hiyak, madikte hiyeg ka muwaka giyaki hiyeg dax givinkis. Madikte hiyeg kavigsa gewkan. Kuri nah isahkisap, su tivik.

Ku pis danuh anumekut payt, kabiman kiyhaw. Ku ka hennemanek, pis ka parak pimarekut Ig muhuke ayhte inutak. Ig pes aytekihan, ig pes amadgat inin nikwe in, ig hiyap giwak adukwenewa ugese ke yarayabe. Ig hiyamni henne, ig kabiman kiyhaw. Ayge giwak diyuhe adukwenavrik kabayhtiwa. Ay gihiyakemni woke nikwe, ig sarayh givegyi atere in, yumah yarayavinwa akiw. Payt misekwe kadukwene. Ig tivik nikwe, ig danuh ta gut ginag, eg awna ta git :

- Tanay, kitwikap ?

Ig akkamni madikte pariye kehka gikak ayhte yarayavinwa. Ginag ayavgi :

- Mmah igkis ka kehpi ariknanama ?

- Igkis ka wanakun, kawa.

Igkis misekwen avatra nutaraksan, adahan nah kabayha givinkis. Kuri nah pisenwa kuwis, inneki keh igkis isahkiswen. Henne in pisenwa.